

Elohiem nie ontwy nie. Ek is Yahweh. 22 Met 'n manspersoon mag jy ook geen gemeenskap hê soos 'n mens met 'n vrou het nie. Dit is 'n gruwel¹. 23 En jy mag met geen dier vleeslike gemeenskap hê om jou daardeur te verontreinig nie. 'n Vrou mag ook nie voor 'n dier gaan staan om daarmee te doen te hê nie. Dit is 'n gruwelike vermenging. 24 Verontreinig julle nie deur al hierdie dinge nie, want deur al hierdie dinge is die heidene verontreinig wat Ek voor julle uit verdryf. 25 So het die land dan onrein geword; en Ek besoek sy ongeregtigheid daaraan, sodat die land sy inwoners uitspuig. 26 Maar julle moet my insettinge en my verordeninge onderhou en niks van al hierdie gruwels doen nie die kind van die land of die vreemdeling wat onder julle vertoef. 27 Want die mense van die land, wat voor julle gewees het, het al hierdie gruwels gedoen, en die land het onrein geword. 28 Laat die land julle dan nie uitspuig as julle dit verontreinig nie, soos dit die nasie uitgespuig het wat daar voor julle was. 29 Want almal wat enigeen van hierdie gruwels doen die siele wat dit doen, moet uitgeroei word onder hulle volk uit. 30 Daarom moet julle my ordening onderhou om niks te doen van die gruwelike insettinge wat voor julle gedoen is nie, dat julle jul nie daardeur verontreinig nie. Ek is Yahweh julle Elohiem.

Wayyiekra / Levitikus 19:1 Verder het Yahweh met Mosheh gepraat en gesê: 2 Spreek met die hele vergadering van die kinders van Yiesraël en sê vir hulle: Afgesonder moet julle wees, want Ek, Yahweh julle Elohiem, is afgesonder. 3 Elkeen moet sy moeder en sy vader vrees, en my Shabbatte hou. Ek is Yahweh julle Elohiem. 4 Begeef julle nie tot die afgode en maak vir julle geen gegote afgode nie. Ek is Yahweh julle Elohiem. 5 En as julle 'n dankoffer aan Yahweh slag, moet julle dit so

offer, dat julle goedkeuring kan vind. 6 Op die dag as julle dit offer en die dag daarna, moet dit geëet word; maar wat tot die derde dag toe oorbly, moet met vuur verbrand word. 7 En as dit tog op die derde dag geëet word, sal dit 'n onrein ding wees; dit sal nie met goedkeuring aangeneem word nie. 8 En hy wat dit eet, moet sy ongeregtigheid dra, want wat afgesonder is aan Yahweh, het hy ontwy. Daarom moet daardie siel uit sy volksgenote uitgeroei word. 9 En as julle die opbrings van julle land oes, moet jy die kant van jou land nie totaal afoes en die are wat val, nie versamel nie. 10 Jou wingerd moet jy ook nie skoon afoes nie, en die trossies wat van jou wingerd val, nie versamel nie. Vir die arme en die vreemdeling moet jy dit laat oorbly. Ek is Yahweh julle Elohiem. 11 Julle mag nie steel nie, en julle mag nie lieg nie, en julle mag die een die ander nie bedrieg nie. 12 En julle mag nie vals sweer by my Naam en so die Naam van jou Elohiem ontwy nie. Ek is Yahweh. 13 Jy mag jou naaste nie verdruk of beroof nie. Die dagloner se loon mag by jou nie tot die môre toe bly nie. 14 Jy mag 'n dowe nie vloek nie, en voor die blinde geen struikelblok lê nie; maar jy moet jou Elohiem vrees. Ek is Yahweh. 15 Julle mag geen onreg doen in die gereg nie. Jy mag vir die geringe nie partydig wees nie en die aansienlike nie voortrek nie. Met geregtigheid moet jy oor jou naaste oordeel. 16 Jy mag nie as 'n kwaadspreker onder jou volksgenote rondloop nie. Jy mag nie teen die lewe van jou naaste optree nie. Ek is Yahweh. 17 Jy mag jou broer in jou hart nie haat nie. Jy moet jou naaste vrymoedig berispe, sodat jy om sy ontwil geen sonde op jou laai nie. 18 Jy mag nie wraakgierig of haatdraend teenoor die kinders van jou volk wees nie, maar jy moet jou naaste liefhê soos jouself. Ek is Yahweh. 19 Julle moet my insettinge hou. Twee soorte van jou vee mag jy nie laat paar nie. Jou akker moet jy nie met twee soorte saad besaai nie. En 'n kleed van twee soorte goed, van gemengde stof, mag nie op jou kom nie. 20 En as 'n man vleeslike gemeenskap het met 'n vrou wat 'n slavin is, vir 'n ander man bestemd, sonder dat sy ooit losgekoop of vryheid aan haar gegee is, dan moet daar bestraffing plaasvind. Hulle mag nie doodgemaak word

¹ 18:22 Ander dinge wat ook vir Yahweh 'n gruwel is, is onder meer menslike offers (Devariem 12:31); die dien van vreemde magtigings (Devariem 13:13-14); die eet van onrein kossoorte (Devariem 14:3-8); die bring van minderwaardige offers (Devariem 17:1); betrokkenheid by okkultiese aktiwiteite (Devariem 18:9-14) en oneerlike saketransaksies (Devariem 25:15-16).